

आकाशवाणी

खबरां विजय बजाज कोला,

पैहले खास-खास खबरां:-

1. प्रधानमंत्री नरेन्द्र मोदी होरें सेशेल्स दी आजादी दे बरे पूरे होने पर आयोजित 50 राश्ट्रीय दिवस समारोह च मुख परौहने दे तौर पर हिस्सा लैता।उनें मॉरिशियस दे प्रधानमंत्री डाक्टर नवीनचंद्र रामगुलाम हुंदे कन्नै बी मलाटी कीती।
2. अमरीका ते ईरान ने जवाबी कार्रवाई रोकने ते कल कतर दी राजधानी दोहा च परतियै गल्लबात शुरु करने पर सैहमति जताई ऐ।
3. राश्ट्रपति द्रौपदी मुर्मू अज्ज राश्ट्रपति भवन च इस बरे दे दुए रक्षा अलंकरण समारोह च वीरता पुरस्कार भेंट करडन।
4. मौसम विभाग ने अज्ज पच्छिम बंगाल च हिमालय दे तराई आले इलाकें ते सिक्किम च बी मौलेधार बरखा दा रेड अलर्ट जारी कीता ऐ।
5. भारती मर्दे दी हॉकी टीम ने लंदन च FIH Hockey प्रोलीग दे रिवर्स मुकाबले च - 3 इंग्लैंड गी पेनल्टी शूटआउट च-कन्नै हराई दिता।

<><><><><><>

ते हून खबरा विस्तार कन्नै:-

<><><><><><>

PM -Seychelles

प्रधानमंत्री नरेन्द्र मोदी होरें सेशेल्स दी आजादी दे 50 बरे पूरे होने पर आयोजित राष्ट्रीय दिवस समारोह च मुख परौहने दे तौर पर हिस्सा लैता। इस सम्मान गी हासिल करने आहले ओह पैहले भारतीय प्रधानमंत्री बने न। समारोह दी परेड़ च भारतीय नौसेना दे युद्धपोत INS तरकक्ष ते INS इक्षक राजधानी विक्टोरिया च तैनात रेह। भारतीय नौसेना दे बेंड नै बी

समारोह च अपनी प्रस्तुति दिती। एदे च भारतीय नौसेना ते थल सेना दी टुकड़िं हिस्सा लैता। प्रधानमंत्री नरेन्द्र मोदी होर सेशेल्स दे राष्ट्रपति पैट्रिक हरमाइनी हुंदे साददे पर शनिवारे सेशेल्स पुज्जे हे।



PM- Mauritius

प्रधानमंत्री नरेन्द्र मोदी होरें कल सेशेल्स च मॉरीशस दे प्रधानमंत्री डाक्टर नवीनचंद्र रामगुलाम कन्नै मलाटी कीती। दौनें नेता भारत ते मॉरीशस बश्कार चला रदे सहयोग दी समीक्षा कीती। कन्नै गै भारत आसेआ दिते गेदे खास आर्थिक पैकेज तैहत चला रदी परियोजनाएं दी प्रगति पर बी चर्चा होई। दौनें नेताएं भारत दे विजन महासागर “गोआंडी पैहले” ते वैश्विक दक्षिण प्रति सांझी वचनबद्धता तैहत भारत मॉरीशस दी मजबूत रणनीतिक सांझेदारी गी होर अगगे बदाने पर सहमति जताई।



PM -Award

प्रधानमंत्री नरेन्द्र मोदी होरें गी सेशेल्स दा सब्बनें थमां बड्डा सम्मान “गार्डियन ऑफ द ब्लू होराइजन” दिता गेआ ऐ। सेशेल्स दे राष्ट्रपति पैट्रिक हरमाइनी होरें उनें गी एह सम्मान पर्यावरण संरक्षण, सतत विकास ते ब्लू इकोनॉमी गी बढ़ावा देने आस्तै प्रदान कीता गेआ ऐ। प्रधानमंत्री नरेन्द्र मोदी होरें सेशेल्स दी सरकार ते उत्थुआं दे लोकें दा धन्नवाद कीता।

<><><><><><>

US-Iran

अमरीका ते ईरान ने जवाबी कार्रवाई रोकने ते कल कतर दी राजधानी दोहा च परतियै गल्लबात शुरु करने पर सैहमति जताई ऐ। इस गल्लबात दा मकसद रणनीतिक तौर पर महत्वपूर्ण होर्मुज जल डमरु मध्य गी लेइयै पैदा होए दे विवाद दा हल कड्डना ऐ। पिच्छले किश दिनें दरान दौनें मुख्यें बश्कार फौजी कार्रवाई तेज होई गई ऐ। अमरीका ने ईरान पर युद्ध विराम दी उल्लंघना करने दा दोश लांदे होई ओदे फौजी ठिकानें पर हमला कीता हा, जेहदे परते च ईरान ने बहरीन ते कुबैत च अमरीका दे फौजी अड्डें पर बैलिस्टिक मिसाइल ते ड्रोन कन्ने हमले कीते। दौनें मुख्यें फिलहाल फौजी कार्रवाई रोकने पर सैहमति जताई ऐ तां जे होर्मुज जल डमरु मध्य थमां जहाजें दी आओ-जाई आम ध्याड़े आला लेखा जारी रवै ते गल्लबात अगगे बधी सके।

<><><><><><>

Prez Awards

राष्ट्रपति द्रौपदी मुर्मू अज्ज राष्ट्रपति भवन च इस बरे दे दुए रक्षा अलंकरण समारोह च वीरता पुरस्कार भेंट करडन। इस मौके पर राष्ट्रपति थेहारबंद बलें, केन्द्री थेहारबंद पुलस बलें ते राज्य ते केन्द्र शासत प्रदेशें दे पुलस कर्मियें गी वीरता पुरस्कार प्रदान करडन। एह पुरस्कार असाधारण बहादरी दा प्रदर्शन करने आले सैनिकें गी दिते जंदे न। एह सम्मान देसै दी आतंकवाद, उग्रवाद ते बन्ने आले इलाकें च चुनौतियें खलाफ लगातार लड़ाई गी बी दर्शांदे न। कन्नै गै हवाबाज़ी समुन्दरी अभियानें ते मनुक्खी मिशनें पर दस्सी गेदी असाधारण बहादरी गी बी मान्यता दिंदे न। एदे शा पैहले राष्ट्रपति होरें इस्सै म्हीने दी 8 तरीक गी राष्ट्रपति भवन च रक्षा अलंकरण समारोह दे पैहले चरण च वीरता पुरस्कार भेंट कीते हे।



Weather

मौसम विभाग ने अज्ज पच्छिम बंगाल च हिमालय दे तराई आले इलाकें ते सिक्किम च बी मौलेधार बरखा दा रेड अलर्ट जारी कीता ऐ। अगले 2 शा 3 दिनें दुरान दक्खन-पच्छमी मानसून दे गुजरात, मध्य प्रदेश, छत्तीसगढ़, झारखंड दे किश हिस्सें च अग्गे बधने दी संभावना ऐ। अरुणाचल प्रदेश, असम, मेघालय, केरलम ते माहे च अगले दंऊ दिन तेज़ बरखा बरी सकदी ऐ। बिहार, छत्तीसगढ़, मध्य महाराष्ट्र, नागालैंड, मणिपुर, मिज़ोरम, त्रिपुरा, ओडिशा ते समुन्द्री कंडे आले आंध्र प्रदेश च अगले 3 दिन तेज़ बरखा दा अनुमान ऐ। समुन्द्री कंडे आले कर्नाटक, कोंकण, गोवा, लक्षद्वीप, तमिलनाडू,

पुद्दुचेरी, कराईकल, तेलंगाना ते विदर्भ च बी अज्ज ऐसा गै मौसम रौहग। दिल्ली, बिहार, हरियाणा, चंडीगढ़ ते उत्तर प्रदेश च कल्लै धोड़ी लू दे हालात बने दे रौहडन।

<><><><><><>

Hockey

भारती मर्दे दी हॉकी टीम ने लंदन च FIH Hockey प्रो-लीग दे रिवर्स मुकाबले च इंग्लैंड गी पेनल्टी शूटआउट च 3-2 कन्नै हराई दिता। तय समें तगर दवै टीमां सिफर-सिफर दी बरोबरी पर हिआं। पेनल्टी शूटआउट च भारत दे अभिषेक, शिलानंद लाकड़ा ते हार्दिक सिंह ने गोल कीते। मैच च शानदार प्रदर्शन लेई डिफेंडर संजय गी Player of the Match चुनेआ गेआ। हॉकी विश्व कप शा पैहले FIH Hockey Pro League च एह भारती टीम दा आखरी मुकाबला हा।

<><><><><><>

Cricket

मर्दे दे टी-20 क्रिकेट च आयरलैंड ने भारत गी मजूदा श्रृंखला दे दुए ते अखीरले टी-20 अंतराष्ट्री मैच च भारत गी कल इक रन्ज कन्नै हराई दिता। इस जित दे कन्नै आयरलैंड ने दंडू मैचें दी श्रृंखला 2-0 कन्नै अपने नांs करी लैती। इस जित दे कन्नै आयरलैंड ने इतिहास रची दिता ऐ कीजे इस श्रृंखला शा पैहले आयरलैंड ने कर्दे बी भारत गी कुसै बी क्रिकेट मैच च नैई हराया हा। कल बेलफास्ट च पैहले बल्लेबाजी करदे होई आयरलैंड ने 20 ओवरें च 8 विकेटें पर 154 रन्ज बनाए जेदे जोआब च भारती टीम 153 रन्ज गै बनाई सकी।

<><><><><><>

Women WC

ICC महिला टी-20 विश्व कप च कल रातीं आस्ट्रेलिया नै भारत गी 6एं विकटें कन्नै हराई दिता। लंदन दे लार्डस मैदान च भारत नै पैहले बल्लेबाजी करदे होई तय 20एं ओवरें च 4 विकटें पर 170 रन्ज बनाए जेदे परते च आस्ट्रेलिया ने 19 ओवरें च 4 विकटां मुहाड़यै लक्ष्य हासल करी लैता।

<><><><><><>

FIFA WC

फीफा विश्व कप दे नॉकआउट चरण च कनाडा नै दक्खन अफ्रीका गी 1-0 कन्नै हराई दिता। अमरीका दे लॉस एंजिलिस च खेड्ढे गेदे मुकाबले च कनाडा दे स्टीफन यूस्टाकियो ने इक्कला गोल कीता। सह-मेज़बान कनाडा नै मैच दे अखीरले मिंटें च मज़बूत रक्षात्मक खेड्ढे दा प्रदर्शन कीता। कनाडा दा अगला मुकाबला शनिवारें ह्यूस्टन च नीदरलैंडस जां मोरक्को कन्नै होग। विश्व कप दा फाईनल 19 जुलाई गी खेड्ढेआ जाहग।

<><><><><><>